

四庫全書

集部

欽定四庫全書

集部

宋詩紀事卷七十二

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱炘

謄錄監生臣孫祥鳳

欽定四庫全書

宋詩紀事卷七十二

錢塘厲鶚撰

張堯同

堯同嘉興人有嘉禾百詠

嘉禾百詠

存十首

及山

舟竈功成後寥寥掩石扉但聞蟬已蛻不見鶴來歸

蘇小小墓

泉下骨應朽幽魂獨未銷
幾番清夜月孤影度南橋

韭溪

終與雙溪接分流入市來
市橋人影合不解洗塵埃

朱買臣墓

世事春風轉榮枯一夢間
繡衣人不見孤冢舊家山

天心湖

拍岸浮春綠菰蒲四遠生
網羅人不到魚鳥亦忘情

月波樓

天濶冰河淨溪平玉鑑寒卷簾看晚色鷗鳥傍關干

列岫亭

吾州風物好唯是欠青山忽有洞庭色來從一笑間

跨塘橋

路接張涇近塘連谷水長一聲清鶴唳片月在滄浪

樂郊亭

竹下清風好時來挂幅巾待逢田叟問誰是樂郊人

長水鄉

古鄉也故楞嚴大師子璿作楞嚴疏文謂之長水疏

古來名未滅人好水還清一讀高僧疏塵勞悟此生

以上

嘉禾百詠

梁佐

佐理宗時人與史安之倡和

高山堂

危巔層閣倚雲平一凭危闌醉魄醒霽雨亂山生淡碧
帶風寒竹有餘青孤猿傍石來深磴幽鳥衝烟入畫屏
卻讓高僧占仙景蓬萊不獨在滄溟

嶧縣志

毛翊

翊字元白三衢人有吾竹小橐

李蘄和父序云柯山毛元白詩人之秀者也惜其少文自晦不求聞于時吟橐一帙清深雅正跡前事而寫芳襟有沈千運獨挺一世之作

廬山栖賢寺

名重于諸刹前賢舊隱蹤無人知有路隔樹忽聞鐘瀑壯山疑裂雲深寺若封或傳遺橐在三叩昔時松

墨龍

真人尸居雷八荒斷甄殘墨生蒼茫鯢桓下睽九淵墨
神光倒射角與亢平聲明明元氣淋漓蹟水底焚槐海波
赤周流萬化元無極姑使人心識天則

浙江

白鷗舊事隨波去太極陰陽自吞吐長虹夜貫黑頭船
四紀沙迎相公路馮夷作劇真等閒五都有客雄其間
上林三官浪憂國千年海底生銅山

丹陽館

渡江南來第一驛幾度華堂延雁客百年運逐曉雲空
愁殺鞮官老無職南徐今日古陽關不斷歌聲祖離席
國讐已復事尤多折損年年春柳碧

富池廟

船頭蜀錦三千尺倒影長虹浸寒碧相逢不是紫髯郎
鸚鵡洲邊眼生棘江頭簫鼓雜靈鴉人道陰兵曾護國
安知樓下雪千堆不是吞曹氣衝激

滄浪亭

濯纓人去水空寒事屬明時欲問難日暮客歸園館閉
鷺鷥飛上石碁槃

子美故物唯石枰存

石湖

一片湖光接薜蘿功名餘事屬吟多至今魚鳥皆堪敬
曾見烏巾照碧波

以上吾竹小橐

黃伯厚

晚泊

片帆寂寞繞孤村茅店驚寒半掩門行草不成風斷雁

一江烟雨正黃昏

後村千家詩

范大中

立春寄梅壇楊逸老

仕路蹉跎又見春
區區深厭走紅塵
未能解脫無窮事
長憶逍遙自在人
瓦缶汲泉朝灌藥
羽衣濛露夜朝真
灑然物外清虛境
呼吸淳元養氣神

梅仙事實

劉瀾

瀾字養源號江村天台人初爲道士還俗干謁

無成卒

劉後村跋云天台劉君瀾詩四卷短篇如新戒
縛律大篇如散聖安禪詩之體製畧備

桐江曉泊

風蕭蕭冰瑟瑟淡烟空濛冠朝日灘頭枯木如畫出鸚

鵒飛來添一筆

梅磎詩話

夜訪侃直翁

疎瓴亂見星危坐冷無燈索句髮先白餐蔬貌盡青棲

禽翻麓雪墮栗破溪冰昨夜中峯頂因看海日昇

瀛奎律髓

句

東風半綠官圩草西日遙紅別岸山

梅磎詩話

李億

柳

倚岸依依一兩株溪風吹影暮烟疎青條拂水長如線
釣叟折來穿白魚

後村千家詩

劉允升

繭漆花

清晨步上金雞嶺極目漫山繭漆花雪藥瓊絲亦堪賞

樵童蠶婦帶歸家

全芳備祖

易元矩

斑竹

一別虞妃去不還愁雲空鎖九疑山
世間多少相思淚

灑徧脩篁染不斑

全芳備祖

何應龍

應龍字子翔錢塘人有橘潭詩彙

春寒

博山熏盡鷓鴣斑
羅帶同心不忍看
莫近闌干聽春雨
樓高無處著春寒

有別

樓上佳人唱渭城
樓前楊柳綰離情
一聲未是難聽處
最是難聽第四聲

臨安僦樓

過了燒燈望燕歸
春寒剗地勒芳期
杏花深巷無人賣

細雨空簾盡日垂

芍藥

金蕊絲頭茜染成五雲樓映玉盤傾謝郎一入中書後

二十四橋空月明

以上橘潭詩豪

傷春

玉纖輕揭繡簾開行到花前淚滿腮正爾春心無處託

一雙蝴蝶忽飛來

後村千家詩

蔡藥

槃號邃菴永嘉人

瓜洲

烟際繫孤舟蘆花兩岸秋江空雙雁落天迴一星流急

鼓西津渡殘燈北固樓商人茅店下沽酒話揚州

東甌詩集

羅竹谷

竹谷廬陵人羅大經之父名字未詳

送曾雲巢被召

秦華山人上赤墀上嗟安在見何遲老于尚父投竿日

少似轅生對策時，怨鶴驚猿辭舊隱。
鞭鸞笞鳳總新知，早陳經國平邊策。
歸領雲巢舊住持。

送胡季昭竄象郡

好讀牀頭易，一編盈虛消息總。
天然崢嶸齒頰皆冰雪，月怕炎方有瘴烟。

以上鶴林玉露

羅大經

大經字景綸，廬陵人。登第爲容州法曹掾，著鶴

林玉露

茶聲

松風檜雨到來初，急引銅瓶離竹爐。待得聲聞俱寂後，

一甌春雪勝醍醐。

鶴林玉露

陪桂林伯趙季仁遊桂林暗洞列炬數百隨以鼓吹市人從之者以千計已而入申而出入自曾公巖出于棲霞洞入若深夜出乃白晝恍如隔宿異世季仁索余賦詩紀之

瑰奇恣搜討，貝闕青瑤房。方隘疑永巷，俄敞如華堂。玉

橋巧橫溪瓊戶正當窗仙佛肖髣髴鐘鼓鏗擊撞聵聵
左顧龜狺狺欲吠庖丹竈儼亡恙芝田藹生香搏噬千
怪聚絢爛五色光更無一塵浣但覺六月涼玲瓏穿數
路屈曲通三湘相傳與九疑通神鬼妙剡刻乾坤真混茫入如
深夜暗出乃皦日光隔世疑恍惚異境難揣量鶴林玉露

王荆公

錯認蒼姬六典書中原從此變蕭疎幅巾投老鍾山日
辛苦區區活數魚

鶴林玉露王荆公新法煩苛毒流寰宇晚歲歸
鍾山作放魚詩云物我皆畏苦舍之寧啖茹其
與梁武帝窮兵嗜殺而以麪代犧牲者何殊

吳規父

蛙

斂藏鼓吹寂無言
踣跳何曾離草根
舉世盡貪生處樂

坎中應自有乾坤
後村千家詩

劉汝進

汝進號山翁漫塘幼子

與客九日遊龍山以塵世難逢開口笑分韻得口

字

縱步龍山顛放舟尤蕩口羣然雁鷺行雜之牛馬走我

拙不能詩我病不能酒試問賞花人還有菊花否

山房
隨筆

呂 炎

炎字仲明

閨思

夜久香銷翡翠奩十分春恨上眉尖茶蘼謝了櫻桃過

人影參差月半簾

詩林萬選

車若水

若水字清臣號玉峯山民黃巖人從杜清獻公
游有脚氣集玉峯穴豪

江湖偉觀

十年不向此凭闌景象依然一望間龍蜃吐雲天入水
樓臺倒影日銜山僧于僻寺難爲隱人在扁舟不是閒
孤鶴似尋和靖宅盤空飛下復飛還

咸淳臨安志

庚申

襄陽耆舊總堪羞只有龐公已入州
自向芭蕉眠夜雨不堪更鼓在牀頭

赤城詩集

陳嘉言

嘉言侯官人仕爲建州司戶咸淳末築室台嶼
人稱書隱先生

題太姥墓

太姥山在福寧州東堯時有種藍老姥
家於路傍有道士求漿姥飲以醪因授

丹砂服之七月七日乘龍上升有虛墓存焉

吾聞堯時種藍嫗世代更移那可數帝堯朽骨無微塵
此間猶有堯時墓墓中老嫗知不知五帝三王奚以爲
狼貪鼠竊攫尺土窾木未枯已易主君不見仙人掌分
明指取青天上騎龍謁帝大羅天不逐華蟲挂塵網又
不見石碁盤人去盤空局已殘當時勝負此何有爭先
劫奪摧心肝請君絕頂試披寫左望東甌右東冶山川
不見無諸搖但見烽烟徧郊野野老吞聲掩淚哀茫茫

滄海生蓬萊

名勝志

羅與之

與之字與甫螺川人有雪坡小橐

玉梁道中雜詠

清商汎西來刺刺滿林塢
草木儵變衰柯葉不相顧
昔時翳空雲今作連山雨
菊花猶強項籬邊爭媚嫵

泠泠澗底泉破碎山根翠
似欲畱佳客曲折二十四
我行無定止蠟屐信所詣
偶來儵舍去乘興聊復爾

濛鴻玉梁境縹緲雲霞仙
月壇白雲洞遺址空依然
千

年唯亂石蹲踞秋山烟徘徊莫可覓酌盡丹井泉

山居

雨作糟牀注秋生鱸膾思卷簾了清景流水裊烟絲

一夜

潦收野水淨雲陣布重陰一夜西風急千山黃葉深身
猶披暑服耳已厭寒砧對此無心者還應雪滿簷

寄衣曲

愁腸結欲斷邊衣猶未成寒窗翦刀落疑是劔環聲

爲言

日薄寒濃春意微
花鬚柳眼尚依稀
爲言羯鼓休頻打
催得先開卽早飛

山行

盡日流連興未闌
寒鴉背負夕陽還
遙知今夜空窗夢
只在江南水石間

倦倚

蟬聲燕語細相和
池雨纔浮點點荷
倦倚闌干消永日

葡萄陰薄柳風多

以上雪坡小橐

陳東之

游沃洲山

我本名山人屢作名山興天台一住三十年盡日捫蘿
陟雲磴上攬四萬八千丈之高秋參差明河兩肩並下
瞰三百六十度之朝暾滅沒飛烟八荒淨或隨仙氣得
丹牀雙闕夜深看斗柄今年積雨天地晴一策快作西
南征沃洲最佳天姥勝連山直下秋崢嶸竹萌修纈會

稽箭芝莖菌蝨商山英秋陽不碎空翠影絕壑倒瀉銀
河聲山腰細路如絲直三兩漁樵行落日炊烟暝色小
茅屋松子秋聲斷崖石溪流飯屑胡麻香土輒春膏霜
朮白送書松際有猿公問酒礪陰多木客青冥樓閣仙
人家鬱藍流光瀉晴碧霓旌隊下鶴萬羣絳節朝回雲
五色人間但有桃花源桃花春香流水渾三生凡骨不
得到兩耳夜半空聽猿李白尋真不得返支遁卜築遠
費錢至今山靈護光怪石蘿山薜餘秋妍陳郎故宅更

深悶雞犬林塘隔塵世清秋著屐一登之路僻夕陰門
半悶盤陀石在長楠陰脫畧塵纓換秋意晴窗示我兩
山圖老眼摩挲觀一二便揮健筆寫我詩惜哉賞音今
絕稀謫仙一去五百載人間山水無清輝舊時仙人白
雲唱怪我白首歸何時我生白首歷浩劫眼中億萬蟲
沙春夢非陳郎挽我十日住掉頭不顧自有南山期餐
霞絕粒鍊精魄長生之學非荒嬉三千年前有宿約來
已不早歸不遲長揖羣仙謝兒輩倒挾萬里冥鴻飛

越詠

保應廟

投迹空山計已非江都消息亂來稀廟前幾種春香草
錯怪王孫去不歸

新昌縣志縣之十四都隋諸王避難歿葬其地
水旱疾疫祈禱輒應宋寶慶二年從鄉民之請
建廟賜額陳東之有詩云云

吳濟

濟字巨川號廉靜

鮑家田

搖旆家家酒扶犁處處村草深迷井口槿密擁籬根綠
水明秧本青山失燒痕多應忌蠶事畏客閉柴門

咸淳臨安志鮑家田在錢塘門外東山街之北
吳越相鮑君福賜田于錢塘因以名焉吳廉靜
有詩

野外卽事

橫木渡前溪藤深路欲迷瘦筇諳亂石老屐帶新泥盡

日綠陰合有時黃鳥啼多情雙蛺蝶飛徇帽簷低

前賢
小集

拾遺

劉蕭仲

子規

深藏密葉人難見
斷送春光夢一空
啼後血流成底事

只應都作暎山紅

後村千家詩

丁先民

游大滌山

我欲避塵囂
乘風入洞霄
循溪山作路
駕水石爲橋
臺

殿黃金鎖神仙碧
玉簫拂衣天柱頂
清思欲飄飄

洞霄詩集

張簡

簡號槎溪

天津橋月夜

行闕獨崔嵬垂楊夾道栽
河通桃葉渡門對雨花臺
世事基千變人生夢一回
誰知今夜月曾照六朝來

詩林
萬選

吳震齋

玉簪花

素娥昔日宴仙家
醉裏從他寶髻斜
遺下玉簪無覓處

如今化作一枝花

全芳備祖

馬樗山

瓊花

三月淮南鼓戰塵無雙亭下隘遊人此花不解興亡意

也向年年關一春

全芳備祖

王琮

琮字中玉括蒼人監永嘉酒稅有雅林小橐

題獨醒小亭

東嘉酒舍予所創

退食多留此，倏然一散襟。
涼從曉來覺，秋向雨中深。
牆竹侵山色，檐茅雜柳陰。
有誰能載酒，過我共幽尋。

秋夜有懷醉書十韻

秋風從何來，颭颭入窗牖。
殘燈耿不寐，照我客顏厚。
故園豈不佳，亦頗興懷否。
黃金桂百樹，碧玉池十畝。
猿鶴響空山，亭臺映疎柳。
觥籌雜野菽，筆硯得佳友。
愁無彈鵲句，雋有持螯手。
人生行樂耳，功名有時有。
點檢屐幾兩，土苴米五斗。
浩然歸去來，萬事不如酒。

舟過孤山

寂寞梅花處士墳竹圍巖腳一泉深
偷瞻翠輦曾遊處

水鑰年年護綠陰

以上雅林小彙

李景文

景文號東谷黃巖人有東谷詩彙

病後感興寄車玉峯先生

折梅寄故人故人青雲間青雲杳無路
夢裏相往還我愛梅花媚彼惜桃李
顏相逢不相契何事勞追攀守此

歲寒心持以遺所懽

廬墓有感

流水遶門去愁雲壓徑斜無人燒柏子有客問梅花橘

熟猿窺樹池空鳥啄沙自傷寒谷日不及照昏鴉

以上台州

府志

陳以莊

以莊字敬叟號月溪建安人

劉後村跋云敬叟才氣清拔力量宏放穀城黃子厚之甥也故其詩酷似云

闕題

鳳簫一去幾經年古木青蘿鎖洞天
黠鬼不量曾竊藥真人豈礙作飛仙
細看丹竈凝烟地知有清朝應世賢
欲下蒼崖卻回首何時著我弄雲泉

後村千家詩

春興

輕衫短帽久塵埃零落香篝媿麝煤
春半工夫花繡了社邊消息燕銜來
豈無綠野供千騎幸有黃封可一杯
明日清明能出否憑誰先爲掃莓苔

詩林萬選

吳惟信

惟信字仲孚雲川人寓吳中有菊潭詩集

蘇堤清明卽事

梨花風起正清明
游子尋春半出城
日暮笙歌收拾去
萬株楊柳屬流鶯

西湖雨吟

溼了荷花雨便休
晚風歸柳澹於秋
一生不作機心事
合轉船頭向白鷗

曉吟

翠帳香清捲碧紗
風捎殘雨溼檐牙
蜻蜓亦被涼勾引
清曉低飛入水花

秋夕

南風吹露下秋空
烏鵲無聲占碧桐
天氣微涼人好睡
闌干閒在月明中

野望

閒與蘆花立水邊
歸心客思兩茫然
夕陽收盡天風急

一樹寒鴉落野田

拜和靖墓

墳草年年一度青梅花無主自飄零定知魂在梅花上
只有春風喚得醒

自序

一劍辭家竟陸沈夢思空向故廬深槎迷河漢千年恨
樹隔關山萬里心衣垢正憐貧未去鏡明忽有老相尋
春歸不與人爲約青草催詩亦懶吟

秋夕

雨聲雲氣暮蕭蕭
羅扇恩疎井樹凋
心事暗隨歸夢去
壁燈畱與可憐宵

詠貓

弄花撲蝶悔當年
喫到殘糜味卻鮮
不肖春風畱業種
破羶尋夢佛燈前

以上菊潭詩集

絕句

白髮傷春又一年
閒將心事卜金錢
梨花瘦盡東風嫩

商畧平生到杜鵑

齊東野語糜先生吳之老儒也時吳仲孚客吳一日遇諸塗叩以近作仲孚誦絕句云云糜老屈膝拜曰子謫仙人也老夫每欲效顰則漢高祖唐太宗追逐不少置矣

翁元龍

元龍字時可號處靜四明人杜清獻成之之客

題曹娥墓

自從西子入吳宮幸有英娥可勸忠同姓最慙曹孟德
垂名只許叔先雄虛生浪死人何限白日青天古一同

看得冢頭三寸草也嫌桃李嫁東風

娥江題詠

葉維瞻

維瞻號石軒

題西陽嶺

杜鵑啼處花成血燕子忙時麥未胎舉世但知春易老
不知春老幾人來

詩林萬選

徐存

存號寓軒

遊洞霄宮

清真羽士舊仙官日奉琳宮紫翠間
五洞烟霞龍窟宅一壺天地道家山
滌泉盤轉冰涵沼隱石屏開玉敞關
可笑濯纓來覽勝輸他高臥白雲間

洞霄詩集

馮輓

輓慈谿人

題慶安寺古松

寒松一幹老蒼蒼古寺門前歲月長
匠伯偶圖舟楫利

禪翁方患斧斤傷得全此日同齊櫟勿翦他年比召棠
可但與君期久遠相將俱列大夫行

陳郁話腴明之慈谿縣慶安寺前有古松夾道
綿亘數里其一最巨蜿蜒若龍飛偃如蓋臨池
之上邑長沈時升有造舟之役睥睨茲松將斤
焉里士馮文學輒作詩以遺沈賴以不伐松因
詩而壽焉

劉元茂

元茂號石澗性愛菊

緡帙得菊葉

何年霜後黃花葉色蠹猶存舊卷詩曾是往來籬下讀
一枝閑弄被風吹

山家清供

陳潤道

潤道天台人

吳民女

吳民嗜錢如嗜飴天屬之愛亦可移養女日夜望長成
長成未必爲民妻百金求師教歌舞便望將身贍門戶
一家飽暖不自憐傍人視之方垂涎朱門列屋爭妍麗

百計逢迎主人意常時疎棄自悲啼一旦承恩多妒忌
古人怕爲蕩子婦夜夜孤眠淚如雨今人甘爲貴人妾
得意失意花上月蕩子不歸寧空房主人喜怒多不常

陳郁話腴吳下風俗尚侈細民有女必教之樂
藝以待設宴者之呼使令莫逆奉承惟恭蓋覲
利瞻家一切不顧名爲私妓實與公妓無異也
長大鬻爲妾狼戾則籍之官動以千計習俗薄
惡莫此爲甚天台陳潤道作吳民女一篇殊益
風教

施
樞

樞字知言號浮玉有芸隱橫舟橐

龜溪市橋見月

樓臺疊翠遶清溪
淺澹雲邊月一眉
行到市聲相接處
倚橋燈火未移時

滄浪亭

長史遺蹤二百年
直教名字到今傳
渚香細浥蓮須雨
野色輕圍竹尾烟
但得幽情關水石
何煩隱跡痼林泉
客中正有塵纓在
來此清遊亦是緣

晚思

客路悠悠強自安，亦因吟事可相寬。
小窗過了廉纖雨，細與東風說晚寒。

開爐次夕以不禁離抱來訪宏菴挑燈細語漏促
忘歸卽事有賦時黃澹翁在焉

客裏情懷不自如，夜深來訪子雲居。
挑燈細按新翻曲，拂案同看舊架書。
梧葉敲風蛩砌冷，菊香消雨鶴庭虛。
相逢且與開眉笑，莫遣吟邊酒盞疎。

以上芸隱橫丹葉

龔炳

炳字文伯高郵人

閒詠

年踰八袞雪蒙頭時對親朋話舊遊萬事無心閒日月
一杯有味小公侯癡兒麁爾逃譏議家訓從來戒克培
世道漸難宜勇退爲吾閒早理松楸

陳郁話腴

鄒登龍

登龍字震父臨江人有梅屋吟

真西山跋鄒君之詩言造理句入律金至百鍊而精珠穿九曲而巧

戴石屏跋讀震父詩卷如行春風巷陌見時花
游女動人心目多矣使其加以苦心進進不已
野夫它日當避三舍

題杜少陵草堂圖

背郭好林塘
誅茅作草堂
因吟白鷗谷
爲卜碧雞坊
籠竹和烟靜
江梅帶雪香
四松經喪亂
閱世幾風霜

梅花

約臂金寒拓綺疏
搔頭玉重壓香酥
含章簷下新妝額
試啟菱花得似無

王氏山居

聞道山居好林深遠俗情茶烟熏壁暗蘿月射窗明學稼脩禾譜栽花識藥名無人覺幽隱爲有讀書聲

以上
梅屋

吟

余觀復

觀復字中行盱江人有北窗詩橐

次韻

榴簇殷紅竹迸青風驚檐玉一時鳴晚來幽趣無人解

流水聲中看月行

北窗詩彙

左瀛

瀛字睿之黃巖人緯元孫咸淳初卒有委羽續

集

妾薄命

妾貌微微改君恩漸漸疎本期爲匹鳥深恐作前魚卻

月無心畫香雲信手梳佳人多薄命不必重欵歔

黃巖英氣

胡子期

子期黃巖人理宗時太學生

訪開公不遇

獨步小菴清憑軒數曉星霜華連野白山色滿門青風
定松猶響香銷室自磬孤雲何處宿案上掩蓮經

黃巖英氣

李景雷

景雷號小憤翁黃巖人

和宋伯仁韻

自笑馮唐老未侯短衣匹馬異鄉遊臥聞破屋蕭蕭雨

坐聽西風葉葉秋
鄴下已非公幹在
周南徒歎子長留
丈夫蓋世英雄氣
冑學世間兒女愁

黃巖英氣

宋詩紀事卷七十二

欽定四庫全書

宋詩紀事卷七十三

錢塘厲鶚撰

王栢

栢字會之金華人初號長嘯後更號魯齋受業
何北山之門郡守蔡抗楊棟台守趙景緯相繼
聘主麗澤上蔡兩書院四方從學者日衆咸淳
十年卒賜謚文獻有集

催雨

人世如居甌驕陽不可鉏未聞芻作狗安得夢維魚賦
斂民生槁干戈國計虛安危關一飽雨意莫躊躇

題定武蘭亭副本

玉華末命昭陵土蘭亭神蹟埋千古率更搨本入堅珉
鹽帝歸裝投定武薛家翻刻愚貴游舊石宣和龕御府
邊塵橫空飛渡河中原荆棘穴豺虎維揚蒼茫駕南轅
百年文物不堪補紛紛好事競新模傾敔醜俗無遺矩
如今薛本亦罕見髣髴典刑猶媚媼清歡盛會何足傳

右軍宅帖以千數託言此筆不可再慨然陳迹興懷語
今昔相視無已時手掩塵編對秋雨

八詠樓

樓壓重城萬井低星從天闕下分輝傷心風月詩應瘦
滿眼桑麻春又肥山到東南皆屹立水流西北竟何歸
倚闌莫問齊梁事斷石淒涼臥落暉

以上魯齋集

王仁

仁字剛仲號立齋劉撝堂何北山之門人

冬日雜興

庭際幽蘭手自種，託根不與春華共。
萋萋同風數竿竹，襟期元作幽人供。
如何江湖浪征逐，芳信卻因鴻翼送。
多慚獨處歲將晚，尚想清聲形曉夢。

濂洛風雅

饒魯

魯字伯輿，又字仲元，自號雙峯。餘干人。從黃幹。
李昉學累薦，召不起。卒。門人私謚曰文元。

琵琶洲

尋陽江上譜無傳化作沙汀越水邊一段遺音人不識

夜深幽咽下灘泉

饒州府志

陳藻

藻字元潔福唐人林網山之高弟有樂軒集

劉后村序云樂軒七十五迺卒年出于其師而窮猶甚于其師城中無片瓦僑居福清縣之橫塘開門授徒不足自給至浮游江湖崎嶇嶺海積鏹得百千歸買田數畝輒爲人奪去今讀其文講學明理浩乎自得不汲汲于希世求合螢窗雪案猶宗廟百官也菜羹脫粟猶堂食萬錢也入則課妻子耕織勤生務本有拾穗之歌焉出則與諸生弦誦登山臨水有舞雩之詠焉

寄劉八

六度封書向小孤，一度逢人寄書無。
劉郎嗔我無短吟，素書百紙難論心。
我愛劉郎可無詩，劉郎愛客還答兒。
我爲父執，倍其年見我呼兄。
挾渠賢撥棄，勿復陳對君。
吟此身憶昔在桂堂，瘧鬼罹我殃。
世情疎客病，移我君家牀。
兒女不辭勞，僕妾何憚忙。
秋風黃葉飛，明燈藥爐傍。
我身何日殞，此念何時忘。
丘嫂晚歲歸，敬我如小郎。
他年山下結吾廬，朝暮往來摩白鬚。
我抱子君抱孫，卻

使相叙爲弟昆

題劉氏翠微亭

舊屋紅蕖外新亭綠樹傍
江晴孤棹見雨近衆山藏
學圃未成趣催詩何太忙
他年多橘柚此地一瀟湘

福州城北吳氏新樓之作

千山匝市繞三山盡屬危樓一
覷間雲漢星辰隨道遠
鄰家花木不容慳憑闌要取
西湖盡落葉尤宜朔吹寒
況是先生莊列輩眼高人境幾層看

融州除夜

臘月牂柯三十日相思覓句上譙樓遙知今夜柴爐會
說我無家更遠遊

春日

獨上譙樓日一迴春風桃李滿城開狂夫欲語無人聽
呼取閒雲共酒杯

以上樂軒集

林尚仁

尚仁字潤叟長樂人有端隱吟藁

陳必復序云林君詩專以姚合賈島爲法而精
安深潤則過之

適越留別

江亭飲罷起離愁何事西風又遠遊
潮信欲來人欲去夕陽紅蓼滿汀洲

春日

未逢知己媿蹉跎又見春風長徑莎
杜宇一聲詩思減楊花三月客愁多
從人乞米貧如舊借吏抄書字半訛
嬾說江湖十年事近來平地亦風波

春晚

春事又無幾陰晴苦不齊久貧交味薄多病語聲低落
絮行風徑歸雲度晚溪故鄉二千里日夜子規啼

吟案

以上
端隱

嚴粲

粲字坦叔邵武人登第官清湘令有華谷集

風雨宿湖心

渺渺平湖四接天孤舟曾繫夜來船折鞭又入風塵去

卻憶秋蓬聽雨眠

秋入

秋入白蘋風浪生
癡雲未放楚天晴
青山湖外知何處
中有斜陽一段明

二水聞角

少日鄉關不解愁
閒聽畫角起譙樓
西風依舊闌干月
獨自瀟湘萬里愁

寄張輯

不見吾張輯新詩何處吟
身留江介遠秋入夜涼深
燈影還家夢
葦聲倦客心
歸來及佳節
細把菊花斟

宿石潭寺寄黃炳

昨夜湖心共泊船
一天星露宿寒煙
朝來極目無洲渚
知採蘋花何處邊

午憩僧房

黃塵吹不到禪房
窗紙風翻葉葉涼
觸熱行來牽晝夢

孤篷聽雨下瀟湘

以上華各集

秋風

門與姑山對溪邊有故廬別來三徑菊閒卻一樓書水
碓長腰米村船巨口魚秋風歸去好畱滯意何如

兵火後還鄉

萬屋烟消餘塔身還家何處訪情親舊時巷陌今誰問
卻問新移來住人

以上詩人玉屑

句

風池行落葉

梅礪詩話止一句爲鄭安晚稱賞次日有中舍
之除

陳景沂

景沂天台人號肥遯著全芳備祖

風雨

風雨瀟瀟夕春寒燈較昏茅簷數椽屋荻浦幾家村網

到江鱗活沽來市酒渾烘衾供結局一覺眇乾坤

全芳
備祖

林洪

洪字龍發號可山泉州人有西湖衣鉢

梅磳詩話泉南林洪字龍發號可山肄業杭泮
粗有詩名理宗朝上書言事自稱和靖七世孫
冒杭貫取鄉薦刊中興以來諸公詩號大雅復
古集亦以已作附於後時有無名子作詩嘲之
曰和靖當年不娶妻只留一鶴一童兒可山認
作孤山種正是瓜皮搭李皮蓋俗語以強認親
族者為瓜皮搭李樹云

西湖

煙生楊柳一痕月雨弄荷花數點秋此景此時摹不盡

畫船歸去有漁舟

後村千家詩

釣臺

三聘殷勤起富春如何一宿便辭君
早知閑腳無伸處
只合青山臥白雲

釣臺集

陳昉

昉字叔方號節齋溫州平陽人以父任入官累
除吏部尚書端明殿學士卒諡清惠

宮詞

桂影婆娑玉殿涼風傳花漏夜聲長
內人亦有思仙者

月下吹簫引鳳皇

後村千家詩

寒食湖上

花瘦水肥三月天
畫橈雙動木蘭船
人家盡換新榆火
唯有垂楊帶舊烟

咸淳臨安志

洪 燾

燾於潛人
洛夔子
以朝奉大夫祕閣修撰兩浙
轉運副使兼知臨安府
除戶部侍郎咸淳四年
除吏部尚書

咸淳戊辰餘月下泮去郡歸里因訪菊巖龔先生

用平舟揚公韻題蓬山堂泉石

人生躑躅中幾若駒過隙安得坐此山枕流復漱石

洞霄

詩集

張蘊

蘊字仁溥揚州人官幹辦行在諸司糧料院有

斗野支橐

江湖偉觀

隄柳朝朝送酒船一闌山色越帆烟蓬萊雲氣東溟外

閭闔星辰北斗邊
突兀向來無此屋
登臨當日有諸賢
夕陽過雁慵回首
吟入關河萬里天

西湖清明

芳天新霽惠風和
輭綠平隄凝不波
桃李無言看客慣
樓臺如畫占山多
游裙匝路填車馬
翠榜開筵鬪綺羅
寂寂寒烟生水面
白鷗奈此月明何

酥

兼味醍醐外
分身乳酪中
江南鳴榔犢塞上
寄飛鴻乾

雨看如幻生鹽訝漸融臘殘猶有待煎取牡丹紅

食蠶次韻芸隱

相黏成什伯峯聳若山王

史南人呼明駝為山王

攻處須犀鐵持

來出蟹湯梅花霜後味竹葉酒邊香坐憶游閩樂今年始得嘗

重游大滌洞天

澗水泠泠石髮新松花香靚翠崖深雲生不沒仙人跡
丹化猶啼擣藥禽洗眼人多求聖水醒心吾獨愛清吟

杖藜更欲過新洞無柰春空又作露

雪川次鶴田韻

茗雪雙流合帆檣萬里通連山黃獨雪一鴈白蘋風酒
戶春醅淺魚村晚市同舊游蕉鹿外未老已成翁

秋思

暑退涼生體氣佳卷簾聽雨感年華西風葉葉梧桐冷
開徧庭前白鶴花

垂虹

四岸俱無只有天烟檣如雨落鷗前不知笠澤翁何許
波上清風一萬年

憶著前遊十四年三高祠下夕陽船無錢買得鱸魚膾
吟就橘花香裏眠

惠山

石苔滑汰屋連斜第二泉邊古佛家一壑松風聽不了
卻畱僧坐自煎茶

毘陵天慶觀龍

殿陰壁老懷仁筆頭角崢嶸春起蟄有時麾斥惠山雲
行雨歸來半身溼

金山

江身臺殿切空雲夜月魚龍影不分八十老僧相引說
潮痕不上郭公墳

以上斗野支豪

翠蛟亭呈孫元素鍊師二首

道人鎖蛟天柱半客來縱蛟作奇觀飛風動地鞠晴雷
雄拏怒攫石欲開明珠萬斛撒成雨忽趁流雲入銀浦

仙田種玉耕春烟潤流九里無凶年問蛟飛去何時還
道人仰笑意自閑月中攜手聽潺湲

剌剌星虹白日寒山香一曲落雲端乘蚪道士排空去

怒雨聲搖碧玉巒

洞霄詩集

劉霆午

霆午清江人

題梅仙壇

吏隱清風幾百年長松脩竹滿壇前漢皇若聽三書諫

未必先生便冝仙

梅仙事實

張弋

弋字彥發河陽人有秋江烟草

丁晦夫跋張君彥發湖海豪士不喜爲舉子業
專意於詩每以賈島爲法所著僅成帙清深閑
雅宛有唐人風致舊名奕字韓伯世爲孟之河
陽人貴耳集張韓伯名弋又名奕頎然而長面
帶燕趙色口中亦作北語許定夫館于麾下欲
命官不受後死于建業定夫葬之蔣山下題曰
大宋詩人張奕墓

春晚

萬事今吾飛絮輕此身如燕又巢成
暗思庾信家邊竹
綠籜新添有幾莖

楚州

落帆停鼓鶴湖頭兩度因循到楚州
柳下人家曾識面
笑求新句寫糝樓

豫章別紫芝

吟苦事俱廢拙深貧未除年來如旅燕
秋至卽移居古
道行黃葉空囊貯素書
一生江海恨惟子最知予

子山寺

迢遞前朝寺經過遂一遊白雲鴉樹曉黃葉鳳臺秋僧

舉開山話人消在世愁殿廊經劫火已費十年修

以上
秋江

烟草

寄秋塘

五湖風雪分頭去千里淮山信腳行涉世真成妄男子

談詩長憶老先生塘邊瓜茹須頻灌郭外田疇粗可耕

莫倚瘦筇吟白髮浪傳詩句入都城

貴耳集

蕭泰來

泰來字則陽號小山臨江人山則之弟理宗朝
爲御史附謝丞相爲右司李伯玉所劾有小山
集

題梅壇毛慶甫雲悅樓

樓立梅峯最上頭日隨元氣與沈浮道心快活雲心似

飛去飛來得自由

梅仙事實

句

官卑豈願乘肥馬食儉惟知取瘦羊

臘祭謁告作梅
碣詩話

黃靜齋

桃花

雨後桃花作片飛風前柳絮點人衣春歸不用怨風雨

無雨無風春亦歸

全芳備祖

張至龍

至龍字季靈建安人有雪林刪餘

宿靈巖

樹杪鐘樓出半層佛牀黠鼠弄殘燈五更石上僧猶定
頭滿清霜喚不應

齊雲寺

雨疎分點下畧約界橫塘接竹通生水寒蘿補壞牆字
塗窗眼黑香染佛衣黃未晚螢先出蕭然兩畫廊

宿易沖道院

松髮經寒亂不梳夜來風減屋茅疎吟邊凍指僵如鐵
袖裏枯筇畫雪書

擬韓偓體

一聲阿鵲顫鸞雙
學調新詞未得腔
拜了夜香郎喚睡
旋收鍼線背銀釭

古別離

扶上花驄酒半醺
望沈鞭影暗銷魂
離情恐被行人覺
背拂菱花補淚痕

以上雪林刪餘

吳公敏

泊舟

潭影靜沈沈維舟傍竹林鄉心寄孤雁寒信起疎砧
吠人家近燈明樹影侵客愁元不寐夜雨更蛩吟

後村千家

詩

姚寅

寅號雪坡派出關西名將後居湖州東林

養蠶行

南村老婆頭欲雪曉傍牆陰採桑葉我行其野偶見之
試問春蠶何日結老婆斂手復低眉未足四眠那得知

自從紙上掃青子朝夕餽飼如嬰兒只今上筐十日許
食葉如風響如雨夜深人靜不敢眠自遶牀頭逐飢鼠
又聞野祟能相侵典衣買紙燒蠶神一家心在陰雨裏
只恐葉溼繅難勻明朝滿簇收銀繭軋軋車聲快如剪
小姑促湯娘剝紕嬉嬉始覺雙眉展繅成白雪不敢閒
錦上織成雙鳳團天寒尺寸不得著盡與乃翁輸縣官
君不見長安女兒嫩如水十指不動衣羅綺我曹辛苦
徒爾耳依舊績麻冬日裏

吹劍錄

投戴岷隱分教

重席先生間世才相逢青眼必須開手遮紅日汗如雨

不是雪中乘興來

梅磳詩話

劉文晦

種梅

佳人天一方歲暮音書絕一枝持贈君猶帶去年雪

後村

千家詩

利登

登字履道號碧澗金川人有髀髻

梅川莫令君拉蒼山諸詩友用予松風首句爲韻
招予游金精至而盜作不果游走佛巖有感

此行爲山來至此事已非雲火四地動御風誰與期
剝牀漸及膚欲去迷所之蒼黃走澗谷勝遊翻在斯
石梯盤七折頓豁萬里奇擁巖千脩篁中著寒泉飛天壤
有此景惜哉前不知逃難乃邂逅自愧還自悲山風送萬
里開闢知誰爲亦有如我徒慷慨來登茲罹難本因此

不悔乃扳窺天亦無如何更供愛日暉平生江海眼此
志良未癡忽憶家山遠寒鳥鳴相依母子各一方而皆
窘賊圍欲歸莽無從痛毒霑我衣

田家

小雨初晴歲事新一犁江上趁初春豆畦種罷無人守
縛得黃茅更似人

癸巳十一月二十五日辭家雪甚作愴然有懷

歲暮游子歸余始爲行客朔風萬里長吹雪犯巾幘臨

行不言苦不忍母心惻乾坤迫短景寒日易傾仄冰池
綠骨巉凍車瓊網澀一寒忍已熟浪出還自責撫劍睨
前岡雲重楚天黑

早起見雪

折竹風高曉夢驚寒鴉一陣噪冬青起來檐外無行處
昨夜三更猶有星

以上敲索

張澹川

寒食

江城吹笛晚風斜
城郭人稀噪亂鴉
火冷烟青寒食過
家家門巷掃桐花

後村千家詩

馬子巖

子巖字莊父號古洲建安人

烏林行

荊州兒曹不足恃
何物老瞞欺
一世兵書浪語十三篇
不料烏林出奇計
隆準雲孫驅伏龍
紫髯強援要江東
戈船植羽蔽寒日
雪浪崩崖驚晚風
行間一卒如兒戲

持火絕江人不意灰銷漢賊終老心功入喬家少年壻
君不見華容道傍春草生魂銷不聽車馬聲哀猿夜啼
霜月冷空餘野燐沙邊明

詩人玉屑此詩辭意精深不減張王樂府惜世
無知者錄遺後人共評之

宋伯仁

伯仁字器之茗川人有雪巖集馬騰橐

戲作

青梅黃盡雨無多柳影重重午日過忽聽隔籬人語笑

採蓮船子上新河

寓西馬塍

嘉熙丁酉五月寓京遭燕僑房西馬塍

十畝荒林屋數間門通小艇水彎環
人行遠路多嫌僻我得安居卻稱閒
尊酒相忘霜後菊一時難盡雨中山
何年脫下浮名事只與田翁賸往還

羊角埂晚行

葛帟蒲履帽烏紗迤邐乘涼到水涯
數寺晚鐘聲未歇滿身涼月看荷花

以上馬塍棗

秋晚

西風吹破墨貂裘多少江山惜倦游紅葉已霜天欲鴈
綠蓑初雨客吟秋

後村千家詩

魏慶之

慶之字醇父號菊莊建安人與玉林黃昇友善
有詩人玉屑

過玉林

一步離家是出塵幾重山色幾重雲沙溪清淺橋邊路

折得梅花又見君

梅磳詩話

張廣漢

宿梅仙壇

夜宿梅壇境山寒萬籟空無才供吏隱有夢憶仙翁石

齒含殘雪松髯奮急風竈烟如可舐跨鶴問鴻濛

梅仙事實

徐集孫

集孫字義夫建安人有竹所吟橐

智果寺觀東坡墨蹟參寥泉

煮茗評詩歲月深堂堂遺像篆烟沈數間老屋關興廢
一段清名無古今碑斷亂雲封字腳亭荒落葉覆泉心
斜陽影裏夷猶處仰止高風不敢吟

水樂洞

路穿巖竇折羊腸處處亭臺御墨香流水不隨人事去
尚餘絲竹舊宮商

重拜和靖先生墓

秋聲爾許悲懷古若爲思菊老泉堪薦山孤草亦萎高

風雷塑鶴殘雨暗荒碑依舊梅千樹無花香似詩

湖西納涼

小艇撐過第一橋酌泉橋下擲詩瓢來遊道院分荷供
擬拉吟僧遣鶴招暮靄直從漁笛起月華高過塔燈遙
且於靜處偷清福人海驚人湧似潮

玉岑

一抹斜陽挂淺林細聽山鳥說春心千年古寺多奇迹
讀了豐碑看玉岑

以上竹所吟彙

徐用亨

用亨括蒼人

偶作

誰把先生號冷官，令名深媿馥秋蘭。
孟公豈是陳驚坐，子夏元非杜小冠。
涇渭合流雖若混，雲泥負絕不相干。
寄言世上多風鑑，一笑何妨改眼看。

吹劍錄吾鄉潘元龜授婺州教授鄰居徐用亨亦呼教授因作詩云云

劉遂初

閣阜山作

春山靈草百花香誰識仙家日月長滿院莓苔綠陰市

茶聲何處隔宮牆

詩人玉屑

沈中行

中行號野逸

游九鎖

青山倚天分九峯或踞虎豹蟠蛟龍奔霆白晝鞭玉虹
鐵花冰激青濛濛中有浩劫元皇宮彷彿崑閬雙衡嵩

洞門誰掣烟霞封玉鼠石燕巢嵌空列炬仰見仙人蹤
枰碁布子局未終冥懷欲喚洪崖翁共翳紫鳳驂飛鴻
一笑弱水三萬里他年相見方壺中

洞霄詩集

劉應子

應子號錦山

游九鎖

大滌仙山不易尋仙人樓閣倚林垞地環九鎖溪爲路
殿合諸峯石作屏落日烟嵐呈紫翠清秋水石寫丹青

我生素負元龍氣東望滄溟醉眼醒

洞霄詩集



宋詩紀事卷七十三

欽定四庫全書

集部
宋詩紀事卷七十四

詳校官監察御史臣李陽樾

侍讀臣孫球覆勘

總校官進士臣繆琪

校對官中書臣朱烜

謄錄監生臣孫祥鳳

欽定四庫全書

宋詩紀事卷七十四

錢塘厲鶚撰

吳會

會號北山

訪別嚴儀卿寄郭招甫

言將遠行邁來宿故人家愛爾時相顧回舟日欲斜論
心付杯酒別路正梅花不待江湖去今朝鬢已華

詩林
萬選

黃君瑞

題草堂寺

草堂禪寺北山陞想見鳴騶入谷時
猿鶴如懷海鹽令
魚龍猶護紹興碑
排巖樹老秋來早上殿
僧稀曉散遲
我亦于今抗塵土
臨風慙讀孔璋移

四川總志

儲 詠

詠字文卿號華谷雲間人著華谷祛疑說

題隱者所居

盡日掩柴門
何人得見君
祇因喧寂異
似有聖凡分
瀑

近夜疑雨山深晴亦雲傳聞九霄翮落羽正紛紛

後村千家

詩

秋夕懷友

樓高不敢眺愁思滿滄洲有夢隔千里無書過一秋晴
風吹野樹落日照寒流客裏添蕭瑟何時得共游

詩家鼎鑪

遊東臯園登漣漪閣

傑閣接平川秋光淡遠烟窗開園外景影占水中天野
色歸吟事征帆過客船危闌人倚徙縹緲十洲仙

至元嘉禾

潘嶼

嶼四明人

客中九日

破帽西風急寒窗敗葉飛重陽今日是三徑幾時歸擔
上多黃菊門前少白衣吟情澹如水一雁叫斜暉

詩家
鼎鑿

顏員嶠

古詩

庭梧驚秋風葉葉凋萎紅行人何不歸委魂逐孤鴻去
日良已賒客身轉飄蓬千里各一涯關山月明中兩臂
恨不羽飛逐君西東

全芳備祖

楊巽齋

巽齋失其名

牽牛花

青青柔蔓繞脩篁刷翠成花著處芳應是折從河鼓手
天孫斜插鬢雲傍

茉莉

麝腦龍涎韻不侔薰風移種自南州誰家浴罷臨妝女

愛把閒花插滿頭

以上全芳備祖

蔣梅邊

梔子

清淨法身如雪瑩肯來林下現孤芳對花六月無炎暑

省爇銅匱幾炷香

全芳備祖

湛道山

茶蘼

雨後溪流半沒沙
粉牆賣酒是誰家
客中不覺春深淺
開了茶蘼一架花

一春多雨少晴光
眼底青春去意忙
已恨點衣紅作陣
絕憐滿架雪生香

全芳備祖

朱正中

正中號力菴

洛陽橋觀水

點點風帆底處還似無似有海門山白鷗卻怕潮頭惡

閒臥汀花野草間

梅礪詩話

徐橘隱

秋日

紅蓼黃花取次秋籬笆處處碧牽牛風烟入眼俱成趣

祇恨田家歲薄收

全芳備祖

虞詔

詔號可齋

絕句

短長亭外柳依依
念我思歸未得歸
粉蝶不知行客恨
也隨飛絮點征衣

荷花

晚來一棹鑑湖東
隊隊峰巒入短篷
一色藕花三十里

淡粧濃抹錦雲中

以上全芳備祖

周登

登號月窗

泛舟西湖

湖邊無日欠春風，金碧樓臺面面同。
白鳥慣隨船上下，畫橋分斷水西東。
百年樂事浮雲外，一段傷心落照中。
老盡風流無問處，藕花今是幾番紅。

詩林萬選

陳熙

熙號月泉樂清人

病起

病起不知老，山妻笑長卿。
一貧眠古屋，多雨落春城。
掃

案藥香在開牕樹葉生因思行樂地前月是清明

東甌詩集

江奎

茉莉

靈種傳聞出越裳何人提挈上蠻航他年我若修花史
列作人間第一香

玉簪

雖無艷態驚羣目幸有清香壓九秋應是仙娥宴歸去

醉來掉下玉搔頭

以上全芳備祖

鍾穎

遊九鎖

大滌通華陽仙家碧雲上飛泉舞蒼蛟絕壁浮翠浪泉石有聲詩雲烟無盡藏落日青山多臨風一長望

洞霄詩集

翁元廣

漁父

吳江楓落荻花秋漁子飄然一葉舟柔櫓數聲沈晚浦寒燈幾點泊蒼洲瀟瀟細雨篷初閉漠漠輕烟網乍收

何日功名如范蠡五湖風雨伴沙鷗

後村千家詩

題臨江茶閣

門外黃塵沒馬韉溪山對此獨翛然一杯春露暫畱客
兩腋清風幾欲僊可但喚回槐國夢不妨更舉趙州禪
凭闌得句未易寫盡日孤烟白鳥邊

詩林萬選

林逋山

牽牛

圓似流泉碧翦紗牆頭藤蔓自交加天孫滴下相思淚

長向秋深結此花

全芳備祖

程 鏜

鏜鄱陽人

游大滌洞

松風吹客衣縹緲凌絕頂古洞不見日篝燈入幽暝蒼
苔暈石花奔泉弄雲影仙游願初遂秋山魂未省我生

有宿約結屋天柱頂

洞霄詩集

彭昌詩

昌詩號雅林

游金精山陳千峯索和

仙去時移境尚同，巖花開落爲誰容。
歌沈石鼓泉空響，局冷紋枰霧半封。
山上丹桃無核種，甌頭青餽自機春。
翠眉不是人間儷，笑殺王孫不再逢。

金精風月

徐覲

覲字庚生永嘉人

秣陵秋望

諸史六朝事同爲遠望空幾年無王氣今日但西風客
舍秦淮上行宮夕照中數株霜後葉猶傍壞陵紅

東甌詩集

丁南

南號鶴林歸安人居烏墩

宴沈知丞園

曲徑方塘百畝園更無煩暑礙風煙當春庭院花如錦
入夜樓臺月滿天鄴架插書金屋底秦箏度曲綠衣前
主人愛客歸休早銀燭高燒酒似泉

烏青文獻

陳葺芷

絕句

夢回歷歷雨聲中
窗影分明曉色紅
出戶方知是黃葉

更無一片在梧桐

全芳備祖

程登庸

題唐顯孝饒娥墓

悠悠古憤倚中流
飽閱川陵四百秋
水際叢祠猶昨日
人間坏土幾荒邱
故鄉愛說饒饒姓
往事空傳柳柳州

滿目夕陽凝睇久
桐花飛落釣魚舟

饒州府志饒娥饒人饒姓娥名父醉漁溺死娥求屍不得哭三日耳鼻流血氣盡伏死明日屍出龜魚浮死萬數鄱民葬之鄱水西橫道上事詳柳子厚碑記宋程登庸詩云云

胡平仲

平仲號虎溪

游金精山

人去壇空幾歷年
塵埃難沒漢山川
竇門深入壺中地
環壁遙開甕外天
致雨土龍如解化
隨時木鶴亦能仙

要知萬劫長生處古篆惟存石鼓篇

金精風月

黃初菴

遊靈鷲寺

屋畔危岑聳佛青客歸僧定掩雲扃
洞猿窅窅循牆過
几上偷翻貝葉經

咸淳臨安志

董將

題真如院怪石

在鹽官縣

茲山翠成堆峭骨乃如許
化工妙融結石罅走青乳
當

年女媧氏煉此不及補岫岫至于今丈室枕其股我來
手摩挲松陰日亭午初疑道士羊亦類將軍虎坐久飢
腸鳴試作先生煮

咸淳臨安志

黃極

極字舜舉豐城人

秋日渡江

雁落平沙一雨收淡烟斜日荻花洲憑誰與作王摩詰

爲寫江南水墨秋

南昌府志

林季謙

客中立春

鬢絲無力受風幡
把酒聽歌意不歡
千里同風亦同俗
客懷終作異鄉看

春寒

稍零數竹綠脩脩
春半餘寒苦似秋
故紙叢中雙倦眼
樵青催喚酪蒼頭

元夕

燒燈城市又新年
璧月樓臺萬管弦
獨有廣文窮相眼
一篝燈火照殘編

扇

分無紅粉轉歌喉
入手輕紈意自秋
不見乘鸞月邊女

一雙胡蝶自風流

以上後村千家詩

林 積

積號丹山

冷泉

一泓清可浸詩脾
冷暖年來只自知
流向西湖載歌舞
回頭不是在山時

武林舊事

林逢子

逢子字德遇見劉後村
送赴省諸友詩

鏡香亭

綠楊深處兩三家
幾度凭闌聽吠蛙
雲錦已空煙水濶

空教人憶舊時花

嘉興府志

上官辰

辰號古崩

游大滌山

山蟠螭足雲千丈溪折羊腸路九迴神骨宵穿秦斧鑿
古壇曾見漢樓臺秋山風雨銀河下月夜笙簫玉佩來
山自青青泉自潔百年蹤跡幾蒼苔

洞霄詩集

趙 殫

殫字成德休寧人三請漕貢試南宮不利遂隱
居徜徉池園以自娛號其詩文曰吟嘯

白杜鵑花

雲樹重重和淚冷
故宮遺廟有知音
秦吳萬里皆芳草

染到山花恨最深

廣羣芳譜

趙克非

克非字志仁
永嘉人號荷畔老漁
又號尋樂翁

上冢

步入巾峯去冥濛
一徑深重泉千古恨
寸草百年心花

發空林色嵐生古壁陰
徘徊歸向夜薄露溼衣襟

東甌詩集

俞煜

煜號省齋餘杭人

游大滌山

萬山低伏天柱起鬱鬱琳宮鎖幽邃泉聲瀉入松風寒
山光滴破雲根翠仙人不歸白日暮箬下還丹已千歲
天高遼鶴不可呼夢魂夜落青山外

洞霄詩集

倪龍輔

龍輔字魯玉號梅村

宮怨

翠袖無香鏡有塵一枝紅瘦不藏春十年不識君王面

始信嬋娟解誤人

詩林萬選

陳月潭

桃花

雙漿春風款款移斜陽平半落芳池不妨暫向橋邊駐

更爲桃花了一詩

全芳備祖

雷震

村晚

草滿寒塘水滿陂
山銜落日浸寒漪
牧童歸去橫牛背

短笛無腔信口吹

宋 蘇圃集

洪漸

漸字陸翁號菘巖淳安人

舟泊港口

月浸蘆花水浸天
漁翁醉後正堪眠
夜深何處孤猿咽

不管江邊有客船

青溪詩集

施真卿

西湖

一曲新腔紫玉簫
護晴簾幙窄蘭橈
柳迷遠近花張錦

小泊危紅第六橋

後村千家詩

鍾說

題梅壇

萬松護嶺與天齊
中有真人舊隱棲
井冷尚畱丹汞暖
壇高近拜斗星低
回思漢室成惆悵
浪費今人爲品題

我欲從之無路去同昇不似許仙雞

梅仙事實

林楚良

題黃氏小園

多少名園錢螯地金鈴撼雀護千花君家無此豪華事

七尺慈孫導母車

詩人玉屑

陳庚生

庚生樂清人善畫

賀家湖

風流誰似賀知章
乞得平湖任草荒
今日藕花三百畝
折來依舊屬君王

東甌詩集

程嘉量

題溫州江心寺

東西兩寺絕塵囂
齋飯全憑早晚潮
解事江流更分斷
爲君題作小金焦

江心寺志

高彥竹

彥竹號野泉永嘉人

送胡彥龍過金陵

金陵往事已成虛
江水清清只見魚
遺廟空存元帝像
故家多有二王書
秋風出塞調生馬
夜月吟淮跨蹇驢
借問新亭諸老淚
而今煙景復何如

東甌詩集

宋詩紀事卷七十四